



Broj, 01-07-10-51-131/2024  
Sarajevo, 23.5.2024. godine

Na osnovu člana 25. stav (1) u vezi sa članom 26. stav (4) Zakona o slobodi pristupa informacijama na nivou institucija Bosne i Hercegovine ("Službeni glasnik BiH", br. 61/23) i člana 5. Pravilnika o postupanju po zahtjevu za pristup informacijama Visokog sudskog i tužilačkog vijeća Bosne i Hercegovine br. 08-02-3075/2010 od 2.9.2010. godine, 08-02-3645/2013 od 24.9.2013. godine, 08-02-388-1/2014 od 22.1.2014. godine i 08-07-2-3459/2021 od 29.9.2021. godine, rješavajući po zahtjevu za pristup informacijama Muzaferu Slomić, [REDACTED], od 9.5.2024. godine, dopunjenom 18.5.2024. godine, predsjednik Visokog sudskog i tužilačkog vijeća Bosne i Hercegovine donosi

## RJEŠENJE

**Odobrava se** zahtjev za pristup:

- informaciji o izmjenama i dopunama Poslovnika Visokog sudskog i tužilačkog vijeća Bosne i Hercegovine koje se odnose na postupak imenovanja i napredovanja nosilaca pravosudnih funkcija;
- informaciji da li je uvedeno pravo na pravni lijek za kandidate u konkursnim procedurama za nosioce pravosudnih funkcija koji uvidom u svoj spis utvrde da je došlo do propusta u ocjenjivanju pravilnosti rada kandidata na pismenom dijelu konkursa.

## Obrazloženje

Visoko sudsko i tužilačko vijeće Bosne i Hercegovine (u daljem tekstu: VSTV BiH/Vijeće) je 9.5.2024. godine zaprimilo zahtjev za pristup informacijama Muzaferu Slomić, [REDACTED] (u daljem tekstu: podnositeljica zahtjeva), koji je dopunjen 18.5.2024. godine, u skladu sa Pozivom na ispravku VSTV-a BiH broj 01-07-10-51-124/2024 od 17.5.2024. godine. Zahtjevom je tražena informacija da li je i kakve izmjene u svom radu izvršilo na postupcima izbora i imenovanja sudija i tužilaca nakon utvrđivanja postojanja sukoba interesa za imenovanje V [REDACTED] M [REDACTED] i V [REDACTED] J [REDACTED] na pozicije sudija u isti sud zbog njihove tadašnje vanbračne zajednice te propusta u ocjenjivanju pravilnosti rada na pismenom dijelu konkursa za sudije i tužioce (pisanje presude) koje je prijavila H [REDACTED] A [REDACTED]. Konkretno, tražena je informacija da li je uvedeno pravo na pravni lijek za sve kandidate koji uvidom u svoj spis utvrde da je došlo do istih ili sličnih propusta u radu Vijeća.

Razmatrajući predmetni zahtjev, u skladu s nadležnostima VSTV-a BiH, utvrđeno je da VSTV BiH posjeduje podatke navedene u izreci ovog rješenja, te da omogućavanje pristupa istim nije protivno odredbama Zakona o slobodi pristupa informacijama na nivou institucija Bosne i Hercegovine (u daljem tekstu: Zakon).

U odnosu na podatke iz tačke a) izreke rješenja, uvidom u službenu dokumentaciju utvrđeno je da je Vijeće, na sjednici održanoj 22. i 23.3.2023. godine, usvojilo Poslovnik o izmjenama i dopunama Poslovnika VSTV-a BiH (u daljem tekstu: Poslovnik VSTV-a BiH), broj 26/23 koji je objavljen 14.4.2023. godine i stupio na snagu 22.4.2023. godine. Navedenim Poslovnikom VSTV-a BiH je u pogledu srodnika kandidata u pravosuđu propisano sljedeće:

Odredbama člana 49. stav (5) Poslovnika VSTV-a BiH u tački a) propisano je „Bez obzira na broj bodova ostvaren po kriteriju stručnosti, kandidat neće biti pozvan na razgovor ukoliko je:

a) u sudu, odnosno tužilaštvu za koje se prijavio na poziciji nosioca pravosudne funkcije zaposlen njegov krvni srodnik u pravoj liniji bez ograničenja, u pobočnoj liniji do četvrtog stepena ili bračni, odnosno vanbračni drug ili srodnik po tazbini, odnosno srodnik vanbračnog druga, do drugog stepena.“

U odnosu na tačku b) izreke rješenja, utvrđeno je da je pravo na djelotvoran pravni lijek, koji se tiče pismenog dijela konkursne procedure, propisan odredbama člana 44. Pravilnika o kvalifikacionom i pismenom testiranju kandidata za pozicije nosilaca pravosudnih funkcija u pravosuđu Bosne i Hercegovine („Službeni glasnik BiH“, br. 78/14, 45/15, 48/16, 12/18, 51/18, 12/21 i 64/21), prema kojima kandidat koji smatra da je došlo do povrede regularnosti postupka kvalifikacionog odnosno pismenog testiranja, može podnijeti prigovor u pisanoj formi Stalnoj komisiji za provođenje testnih procedura, strukturiranog razgovora i unapređenje postupka imenovanja VSTV-a BiH.

Također, Zakonom o izmjenama i dopunama Zakona o Visokom sudskom i tužilačkom vijeću Bosne i Hercegovine („Službeni glasnik BiH“ br. 9/24), konkretno članom 44. stav (4) propisano je pravo na djelotvoran pravni lijek i to na odluku VSTV-a BiH o imenovanju kandidata na funkciju sudije ili tužioca. Odluka o imenovanju je konačan upravni akt institucije Bosne i Hercegovine prema članu 4. Zakona o upravnim sporovima BiH, protiv koje se tužbom može pokrenuti upravni spor pred Sudom Bosne i Hercegovine. U navedenom sporu Sud Bosne i Hercegovine preispituje zakonitost provedenog postupka imenovanja i odlučuje po hitnom postupku.

Postupajući po zahtjevu podnositeljice, uzimajući u obzir sve gore navedeno, odlučeno je kao u dispozitivu ovog rješenja.

#### **Pouka o pravnom lijeku:**

Protiv ovog rješenja podnositeljica zahtjeva ima pravo podnijeti žalbu Žalbenom vijeću pri Vijeću ministara Bosne i Hercegovine u roku od 15 dana od dana prijema istog.

Ukoliko Žalbeno vijeće ne odluči po žalbi u roku od 30 dana od dana prijema žalbe, podnositeljica žalbe ima pravo pokrenuti upravni spor pred Sudom Bosne i Hercegovine zbog šutnje administracije.



Dostavljeno:

1. Podnositeljici zahtjeva
2. Odjelu za imenovanje i napredovanje nosilaca pravosudnih funkcija
3. U spis